

# 1 Pitə

## Nauəuə iətəm Pitə təmaupən mətei Nəghatiən əkuəkır rəha nauəuə u 1 Pitə

**?Pəh təmətei nauəuə u?** Pitə təmətei nauəuə u.

**?Təmətei tətuvən kəm pəh?** Təmətei nauəuə u tətuvən kəm nətəmimi rəha Uhgın nətəm kəutatig ikin pisin pisin min e profens min rəha Pontəs, mine Kəlesiə, mine Kapətosia, mine Esia, mine Pitiniə (1Pitə 1:1). Rəueiu kətəni nərgin nitəni min əha məmə Teki.

**?Natigian təhro lan nian təmətei?** E nian əha, iətəmi asoli rəha Rom, nərgin u Niro, təmərəkın pik niməfaki. Təməh nəfaki min nəuvein kohmis, kəni moh nəuvein. Otəsuvəhiən toh Pitə.

**?Təmətei nauəuə u o nak?** Pitə tolkeikei məmə otəfəri nətəligian rəha nəfaki min nətəm kəutatig e nərahiən. In tolkeikei məmə okotəhtul əskasik e rəhalah nəhatətəiən kəni mautol nati kəti iətəm təuvir, nati əpnəpın nərahiən tətuvə.

### *Pitə təməni təuvir kəm lah*

<sup>1</sup> İəu Pitə, iəu aposil kəti rəha İesu Kristo. İətəni təuvir kəm təməh nətəmi rəha Uhgın nətəm nəutatig ikin min rəfin e profens min u Pontəs, mine Kəlesiə, mine Kapətosia, mine Esia, mine Pitiniə. Uhgın təmətəpın rəkis itəmah, kəni imatəmah ikin səniəmə nəhue niftəni u, itəmah nəpispis min əmə u ikinu.

<sup>2</sup> Tatə Uhgın təmətəpın itəmah mətəu-inu, əupən əupən aɡin, təmol rəhan nəlpəkəuiən mələhu,

kəni in təməhrun rəkis suaru min rəfin rəha nəmiəgəhiən rəhatəmah. Kəni Narmin Rəhan tatol itəmah nəutəhtul pisin motasim məmə, nəkotol nəuia Iesu Krısto, kəni nıran tafəl itəmah e nolıən tərəh min rəhatəmah.\*

Pəh Uhgın otəfən rəhan nəuvırıən mine nəməlinuıən tepət kəm təmah.

### *Otəni-vivi Uhgın o nəlpəkauıən rəhan*

<sup>3</sup> !Pəh kotəni-vivi Uhgın iətəm in Uhgın mine Tatə rəha İərmənig Iesu Krısto rəhatah! E nasəkəhruiıən asoli rəhan, in təmol məmə kitah kotair=pən e nəmiəgəhiən vi, kəni məutələhu=pən əskasik rəhatah nətəligiən lan. Tətıva min lanəha mətəu-inu Iesu Krısto təməmiəgəh min e rəhan nımiıiən.

<sup>4</sup> Kəni e nəmiəgəhiən vi u, kitah okotos natimnati təuvır min əpəha e negəu e neai iətəm Uhgın təmələhu pisin məmə rəhatah. Kəni nati u ko təsəmnəmiıiən, kəni ko təsamıkmıkiən, kəni ko rəhan nəhagəhagiən təsikəiən.

<sup>5</sup> E nəhatətəiən rəhatəmah, nəsanəniən rəha Uhgın tətəhtul pəsıg e təmah mətəuarus=pa in otosmiəgəh itəmah, kəni Uhgın otol əpu rəhan nosmiəgəhiən e naunun nian.

---

\* **1:2** Nəghatiən Kris əhrıuəru tətəni məmə, Uhgın “təmorin=pa nıra Iesu tafəl-afəl itah” u nıpətın məmə tətəikuas e təmah e nolıən tərəh min. Afın min e nəghatiən min u “təmorin=pa nıran tafəl-afəl” mine “nıran tətəikuas e nətəmiıi”: Lev 14:6-7; Sam 51:7; Eks 24:5-8; Hip 9:19; 1Jon 1:7. **1:4** Kol 1:12 **1:5** Jon 10:28; 17:11

<sup>6</sup> Nìkitàmah tətagiən o nati u, nati əpnapın nəmə nian iəkis pisin pisin min kəhuva pau e rəhatəmāh nəmiəgəhiən. Mətəu kəhuva o nian əkuəkir əmə.

<sup>7</sup> Nian iəkis min əha kəutəhuva məmə okotəgətun məmə itəmāh nəutəhatətə pəhriən. Aiən u kol tətoraip-oraip, in nati kəti iətəm nigəm tatus mətəfəl rəkis iətəm tərah min lan. Kəni nian iəkis min əha kotəhmen e nigəm iətəm tatus rəhatəmāh nəhatətəiən mətəfəl rəkis iətəm tərah min lan. Aiən u kol, in nati təuvir, mətəu otəpanikə min nian kəti. Mətəu rəhatəmāh nəhatətəiən, in nati təuvir tapirəkis aiən u kol. Kəni e rəhatəmāh nəhatətəiən, Uhgın otəni-vivi itəmāh, məfəri nərgitəmāh, məfən nisaiən asoli kəm təmāh e nian Iesu Krīsto otuva mietigəm=pa lan.

<sup>8</sup> Nati əpnapın nəməsoteruh pauian Iesu Krīsto, mətəu nautolkeikei in. Kəni nati əpnapın nəsotəhiən u rəueiu, mətəu nəutəhatətə lan. Kəni nìkitəmāh təməri məriaueh e nagienian iətəm in təuvir pik agin tapirəkis, kəni ko iətəmi kəti təruru nəni ərəfinian nəuviriən rəha nagiənian əha.

<sup>9</sup> Nìkitəmāh tətagiən lanəha mətəu-inu itəmāh nautos nati u iətəm nəutəhatətə lan, u məmə Uhgın otosmiəgəh rəhatəmāh nəmiəgəhiən.

<sup>10</sup> Suaru rəha Uhgın o nosmiəgəhiən nətəmimi lan, in nati kəti iətəm iəni min aupən kəmotolkeikei pik məmə okotəhrun tuvən təhmin min, kəni tol lanəha kəmotafin motəsal vivi e nəghatien min lan. Kəni ilah kəməutəghati e nəuviriən u iətəm otuva o təmāh.

<sup>11</sup> Narmın rəha Krīsto təmətətig ilah min, kəni

**1:6** Jem 1:2; 1Pità 5:10

**1:7** Prov 17:3; Sek 13:9; Mal 3:3; Jem 1:3

**1:8** Jon 20:29; 2Kor 5:7

**1:10** Mat 13:16-17

mətəghati kəm lah, kəni aupən ikin mətəni pətīgəm nahməiən iətəm otuva e nəmiəgəhiən rəha Iesu, kəni uərisig lan e nəsanəniən asoli rəhan. Mətəu iəni mīn kəmotalkut o nəhruniən suaru iətəm natimnati mīn əha okəhuva lan, mīne rəhalah nian əhruahru.

<sup>12</sup> Uhgīn təmol əpu kəm iəni mīn aupən məmə, nəghatiən mīn iətəm ilah kəmotəni, kəməsotəghatiən e nian iətəm ilah kəmotatīg lan, mətəu kəmotəghati əmə e nian rəhatah. Kəni rəueiu, nətəmimi kinotəni pətīgəm nəghatiən rəha nanusiən təuvir kəm təmah e nəsanəniən rəha Narmīn Rəha Uhgīn iətəm tatsipən e negəu e neai. Kəni natimnati mīn u kotəuvir agīn məmə nagelo mīn, ilah mīn kotalkeikei məmə okoteruh kəni motəhrun natimnati mīn rəha nosmiəgəhiən e Kristo iətəm kəməhuva.

### *Noliən rəha nəmiəgəhiən iətəm təhruahru*

<sup>13</sup> Tol lanəha, nəkotəkeikei motol rəhatəmah nətəligiən təhtul maru o noliən uək, kəni motəgəhun vivi rəhatəmah nətəligiən. Otələhu=pən əskasik rəhatəmah nətəligiən e nəuviriən iətəm Uhgīn otəfinə kəm təmah nian Iesu Kristo otuva mīn.

<sup>14</sup> Otol nəuia Uhgīn təhmen=pən əmə məmə kəlkələh mīn nətəm kotəuvir kaulol nəuia tətə mīn. Aupən rəkis, itəmah nəməsotəhruniən nīpəhriəniən rəha Uhgīn, kəni nəmautol noliən tərəh mīn iətəm nīkitəmah əmə tolkeikei. Mətəu rəueiu, sotegəhaniən e nətəligiən mīn əha okotiuvi rəkis mīn itəmah.

<sup>15</sup> Uhgîn u iætəm təmauîn e təmah, in tasim məhruahru. Kəni ko itəmah mîn, onəkotəkeikei motasim motəhruahru e natimnati rəfin iætəm nautol.

<sup>16</sup> Nəkotəkeikei motol lanəha mətəu-inu Nauəuə Rəha Uhgîn tətəni məmə, “Nəkotəkeikei motasim motəhruahru mətəu-inu İəu iəkəsim məhruahru.”

<sup>17</sup> Itəmah nəkotətapuəh e nasiruiən o Uhgîn u təhmen məmə in rəhatəmah Tatə, mətəu nəsotaluiən məmə Uhgîn tətakil noliən mîn rəha nətəmimi rəfin, kəni in tatol əmə e noliən iætəm təhmen-əhmen əmə. Tol lanəha, nəsotaluiən məmə itəmah iapispis mîn əmə e nəhue niftəni u. Sotohtəu-pəniən noliən mîn rəhan. Mətəu nian nəutəmiəgəh əhanəh e nəhue niftəni u, onəkotəgîn motisiai Uhgîn e noliən təuvir mîn rəhatəmah.

<sup>18</sup> Nəkotəkeikei motol lanəha mətəu-inu itəmah nəmotəhrun rəkis nati keikei iætəm Uhgîn təmətəou rəkis itəmah lan. Otətəlig-to e noliən rəha nəmiəgəhiən rəhatəmah aupən iætəm nipətin tikə u təmsipən o tipitəmah mîn. Mətəu Uhgîn təmitis rəkis itəmah e noliən tərəh kəha. Kəni Uhgîn təməsosian nəhmti nəmiəgəhiən rəhatəmah e nati kəti rəha nəhue niftəni iætəm otəpanikə, təhmen e silfə mine aiən u kol tətoraip-oraip,

<sup>19</sup> mətəu in təmos nəhmti təmah e nira Kristo iætəm in nati keikei təuvir pik agin. Kristo in təhmen e nəti sipsip təuvir iætəm nīmisiən uə nərahien tikə agin lan.†

<sup>20</sup> Aupən aupən agin, nian Uhgîn təməsol

---

**1:16** Lev 11:44,45; 19:2; 20:7    **1:17** Rom 2:11; Nəh 2:23    † **1:19** E nian rəha Oltestimin, nətəmimi kəmautol sakrifais kəm Uhgîn o təfagə tərəh mîn e nəti sipsip mîn iætəm nərahien tikə e lah. Afin e Eks 12:5.    **1:19** Uək 20:28; Hip 9:12-14

əhanəhiən nəhue niftəni u, təmitəpin rəkis Kristo məmə otol uək əha. Mətəu rəueiu iuəkir o naunun nian, Uhgın təmol əpu in, məmə otuva masiru e təmah.

<sup>21</sup> Kəni e natimnati mın əha Iesu təmol, itəmah nəkotəhatətə e Uhgın, iətəm təmosmiəgəh Iesu Kristo e nimisiən, kəni məfəri in məfən nəsanəniən iətəm təhagəhag mine nisaiən kəm in. Kəni tol lanəha, nəkotəhatətə e Uhgın, kəni mautələhu=pən əskasik rəhatəmah nətəligiən lan.

<sup>22</sup> Nəmotəikuas e rəhatəmah nəmiəgəhiən tinuva mınıvi mın rəkis mətəu-inu nəmotətəu=pən nəghatiən rəha nıpəhriən. Kəni o natimnati mın u, nəkotos nolkeikeiən pəhriən tətəva o təmah mın nəuvein. Kəni tol lanəha, otolkeikei pik itəmah mın e nikin pəhriən.

<sup>23</sup> Otol lanəha mətəu-inu, nəmotair vi rəkis mın, kəni nəmiəgəhiən vi rəhatəmah təmsisipəniən o nətəmimi nətəm ilah rəfin okəpanohmis. Mətəu nəmiəgəhiən vi u rəhatəmah in otətətig naunun tikə, mətəu-inu təmsipən e nəghatiən kəti iətəm tətəmiəgəh mətətig naunun tikə, inu nəghatiən rəha Uhgın.

<sup>24</sup> Nauəuə Rəha Uhgın tətəni məmə,  
 “Nətəmimi rəfin kotəhmen e nimali nımanuvehli,  
 kəni nəuviriən rəfin rəhalah təhmen əmə e  
 nəuginigi əpəha e nikinati.

Nımanuvehli əha tətəukei, kəni nəuginigi mın  
 kəutəmei,

<sup>25</sup> mətəu nəghatiən rəha İərməniğ tətətig itulin nau-  
 nun tikə.”

Kəni inu nəghatiən rəha nanusiən təuvir iətəm nətəmimi kəmotəni pətigəm rəkis kəm təmah.

## 2

<sup>1</sup> Mətəu-inu o nəghatiən mın əha, otəraki e noliən mın u kohiet rəkis e rəhatəmah nəmiəghian: noliən rəfin rəha nəməkiən e nətəmimi kəni matol nərahian kəm lah; noliən rəfin rəha neiuəian; noliən rəha nətəm kəutəni pik nati, mətəu kəsotolian; noliən rəha netetian; noliən rəfin rəha nəni rahian nətəmimi.

<sup>2-3</sup> Itəmah nəmotəhrun rəkis məmə İərməniğ təmol təuvir kəm təmah. Təhmen=pən məmə nəmotun askəuvin nəua niği iətəm tətəhian. Kəni rəueiu nəkotəkeiki məhuva motəhmen e iəpəou mətmətiğ mın u kəutasək o nəmahian. Itəmah nəkotəkeiki motolkeiki pik nauəian mine nəmnimian iətəm təhruahru məuvir məmə nəkotaugin nikitəmah lan. Kəni natimnati mın əha okotol nəkotepət e rəhatəmah nəmiəghian iətəm Uhgın təmosmiəğəh itəmah lan.

### *Kəpiel miəğəh e Nimə Rəha Uhgın*

<sup>4</sup> Uhgın tolkeiki məmə otuvləkin rəhan kəti nimə e tah nətəmimi. Kəni təmitəpin Kəpiel kəti iətəm nətəmimi kəmotəpəh, mətəu in kəpiel keiki tətəmiəğəh məmə Uhgın otətuəuin nimə lan. Kəni nian nəkəhuva o kəpiel u Krīsto e suaru rəha nəhatətəian,

<sup>5</sup> itəmah mın, nəkotəhmen e kəpiel miəğəh mın iətəm Narmın Rəha Uhgın tatos itəmah matuvləkin

Nimə lan Rəha Uhgın. Kəni itəmah pris asim mın, nətəm nautəfən sakrifais mın kəm Uhgın iətəm nıkin tətəgiən ohni mətəu-inu o natimnati iətəm Iesu Kristo təmol.

<sup>6</sup> Təhmen=pən e Nauəuə Rəha Uhgın tətəni lanu məmə,

“Oteruh-to. İətələhu kəpiel əpəha Jerusiləm,\*  
inu kəpiel keikei pik agın iətəm iəu iəmitəpin,  
kəpiel u in rəha nətəuiniən nimə,  
kəni iətəmimi iətəm otəhatətə lan,  
in otəsaulisiən.”

<sup>7</sup> Kəpiel u in nati keikei o təmah nətəm nətəhatətə lan. Mətəu o nətəmimi mın nətəm kəsotəhatətəiən lan, kəpiel u in təhmen=pən e nəghatiən u e Nauəuə Rəha Uhgın iətəm tətəni məmə,

“Kəpiel u iətəm nətəmimi rəha nuvləkiniən nimə  
kəmotəraki lan,  
mətəu Uhgın təmol tuva kəpiel rəha nətəuiniən  
nimə,”

<sup>8</sup> kəni Nauəuə Rəha Uhgın tətəni məmə,

“Kəpiel u tatol nətəmimi kautələs pikien,  
kəni in kəpiel iətəm tatol məmə nətəmimi  
kəutapitətəl lan mautəmei.”

İlah kautələs pikin kəpiel u mətəu-inu kautəhti nəuia nəghatiən, kəni inu nəlpəkəuiən iətəm Uhgın təmol o lah.

<sup>9</sup> Mətəu Uhgın tinitəpin rəkis itəmah məmə rəhan mın, kəni itəmah pris mın rəha Kig, kəni itəmah nətəmi asim mın nətəm Uhgın tətərmənig e təmah, kəni itəmah nəuaniləuis mın kəti iətəm Uhgın

---

**2:5** Rom 12:1; Efəs 2:21-22; Nəh 1:6      \* **2:6** Nəghatiən Kris əhruahru tətəni məmə, “Saion,” nərgin kəti mın rəha Jerusiləm.

**2:6** Aes 28:16; Efəs 2:20      **2:7** Sam 118:22      **2:8** Aes 8:14



təmaskəlīm mənī məmə rəhan. In təmol itəmah lanəha məmə nəkotəhrun nənī pətīgəmīən nənī-vivīən iətəm tətəfəri in o rəhan nəuvīriən mīne natimnati iətəm in təmol. In təmauīn rəkis e təmah məmə onəkohiet e napinəpuīən məmə nəkəhuvən e nəhagəhagiən təuvīr rəhan.

<sup>10</sup> Aupən rəkis, itəmah nətəmimi əpnarīn mīn əmə, mətəu rəueiu, itəmah nauənīlūis mīn rəha Uhgīn. Aupən ikīn, nəməsotəhrunīən nasəkəhrunīən rəha Uhgīn, mətəu rəueiu, nəkotəhrun nasəkəhrunīən rəha Uhgīn.

<sup>11</sup> Rəhak mīn nətəmimi, nīkitəmah otəkeikei mətəhti məmə nəhue niftəni u səniəmə imatah əhruahru ikīn. Kitah kotəhmen e iapīspīs mīn mīne Nanihluə<sup>†</sup> mīn ikīnu. Tol lanəha, iətəni əskasik kəm təmah məmə nəkotəhtul əskasik isəu o nolīən tərāh mīn iətəm nətəlīgiən rəhatəmah tolkeikei. Nətəlīgiən mīn əha, ilah tīkimīr mīn rəhatəmah kəni kəutəluagin e nīkitəmah.

<sup>12</sup> Nian rəfin kitah kəutatīg e nəlugīn e nətəmimi nətəm rəhalah nəhatətəiən tīkə. Kəni nəmiəgəhīən rəhatəmah in otəkeikei məhruahru vivi agīn məmə nati əpnarīn ilah okotətu=pīnə nəghatīən tərāh e təmah, mətəu okoteruh nolīən təuvīr mīn rəhatəmah, kəni ilah okotəfən nīsiaiən kəm Uhgīn e nian in otuva mīn makil nətəmimi lan.

### *Nīsiaiən nətəmi asoli*

<sup>13</sup> Kitah nətəmimi rəha Iərmənīg, kəni kotolkeikei məmə okotīsiai nərgīn. Tol lanəha, nəkotol nəuia nətəmi asoli mīn rəfin nətəm nətəmimi kəutəfəri ilah məmə okotərmənīg.

---

**2:9** Dut 7:6; 14:2; Aes 9:2; Uək 26:18; Efəs 5:8 † **2:11** Nanihluə, Ianihluə – Afīn-to e tīksīnəri. **2:11** Kəl 5:17,24 **2:12** Mat 5:16

Iatəghati e nətəmi asoli təhmen e kig, iətəm in iətəmi asoli agin,

14 uə təhmen e rəhan nətəmi asoli min iətəm tətahli pətigəm ilah o noliən rəhan uək. Ilah okəhuvən motələhu nalpinian kəm nətəmimi nətəm kəutəhti lou rəhalah, kəni məutəni-vivi nətəm kautol noliən təuvir.

15 Nautol lanəha mətəu-inu Uhgın tolkeikei məmə rəhatəmah noliən təuvir min okotəniəhu nəghatian alməli min rəha nətəmimi min u rəhalah nəhrunian tikə kəni tətəni rah itəmah.‡

16 Itəmah səniəmə slef min rəha təfagə tərəh min, mətəu-inu Uhgın təmitis rəkis itəmah. Tol lanəha, otətəu=pən noliən rəha iətəmi kəti lanəha. Mətəu sotəniən məmə, “Uhgın təmitis rəkis iəu, kəni tol lanəha, iəkəhrun noliən nati nak iətəm iəkolkeikei, nati əpnapin in təfagə tərəh.” Kəpə. Itəmah slef min rəha Uhgın, kəni tol lanəha, otətəu=pən noliən min iətəm kotəhruahru.

17 Otəfən nisiaiən iətəm təhruahru kəm nətəmimi rəfin. Otolkeikei nəfaki min, inu nətəmimi min rəha Uhgın, kəni onəkotəgin motisiai Uhgın, kəni otisiai kig.

18 Itəmah slef min, onəkotəkeikei motol nəuia rəhatəmah nətəmi asoli min, kəni motəfən nisiaiən kəm lah. Nəkotol lanəha kəm lah rəfin, nətəm kautol timətig kəni mətəuvir o təmah, mine nətəmi min u kautol noliən əskasik min kəm təmah.

19 Nəmə təhro nautol əmə nati əhruahru min əmə, mətəu rəhatəmah nətəmi asoli min kautol

---

**2:13** Tait 3:1    ‡ **2:15** E nian rəha Pita, nətəmimi nəuvein kəmotəməki nətəm kəutəfaki motəu=pən nəghatian min e lah məmə ilah kəmautol nati pisin pisin min iətəm kəməutatgəhli e lou.    **2:15** 1Pita 3:16    **2:17** Rom 12:10    **2:18** Efəs 6:5

tərah e təmah kəni nəutətəu tərah lan. Uhgın otəni-vivi itəmah nəmə nəutos əmə nian iəkis mın əha kəutəhuva mautohmis əmə e nikitəmah mətəu-inu nəutəsəl=pən əmə o Uhgın.

<sup>20</sup> Mətəu kəsəniən məmə itəmah nətəm nəkotəuvir nəmə nautol noliən tərah kəti, kəni nətəmi asoli kəutoh itəmah ohni, kəni nəsotaiuiən motagım. Nəlpiniən u, in rəhatəmah aru əmə. Mətəu Uhgın otəni-vivi itəmah nəmə nəutos nəhməiən mətəu-inu nautol nati təuvir əmə, kəni məsotagimiən.

<sup>21</sup> Uhgın təmauın e təmah məmə nautol noliən təuvir u, mətəu-inu Kristo təmos nəhməiən o təmah. In təmaupən məgətun noliən əhruahru əha məmə itəmah nəkotohtəu=pən əmə nimei nəhlkın.

<sup>22</sup> Nauəuə Rəha Uhgın tətəni məmə,

“In təməsoliən təfagə tərah kəti,

kəni in təməsəniən nəghatiən eiua mın nian kəti mine.”

<sup>23</sup> Nian nətəmimi kəmotəghati rah lan, mətəu in təməsəhiən ilah. Nian in təmətəu nəhməiən e nıpətin, mətəu in təməsəniən məmə in otəlpin nitai nərahian. Mətəu in təmələhu=pən natimnati rəfin e nəhlmi Uhgın iətəm nian rəfin rəhan nakiliən in təhruahru əmə.

<sup>24</sup> Nian Iesu təməhkuł e nigi kəməluau, kəni təmos nəlpiniən rəha təfagə tərah mın rəfin rəhatah e nıpətin. In təmimis məmə təfagə tərah mın okohmis e nəmiəgəhiən rəhatah, kəni kitah okotəmiəgəh məmə okotohtəu=pən suaru rəha nəhruahruian.

---

**2:20** 1Pitə 3:14,17    **2:21** Mat 16:24; Jon 13:15    **2:22** Aes 53:9;  
Jon 8:46; 2Kor 5:21; 1Jon 3:5    **2:23** Aes 53:7; 1Pitə 3:9

Təmosmiəgəh itah e nahməiən rəha nīməgim e nīpətīn.

<sup>25</sup> Aupən, itəmah nəkotəhmen e sipsip mīn iətəm kəmotəluēi. Mətəu rəueiu, nəmotəuhlin itəmah məhuva o Iətəm Tateh Vivi Sipsip, inu Iətəm Tateh Vivi nəmiəgəhiən rəhatəmah.

### 3

*Noliən təuvir rəha iərman mine pətan u kəmuol marit*

<sup>1</sup> Kəni e noliən əhmen əmə rəha nīsiaiən Iərmənig, itəmah nīpətan nəkotəkeikei motol nəuia rəhatəmah mīn nəman mətəu-inu o nati u. Nəmə ilah kəsotəhatətəiən e nəghatiən rəha Uhgīn, kəni rəhatəmah noliən təuvir mīn əmə okotiuvi=pən rəhalah nətəligiən o Uhgīn. Noliən təuvir mīn rəhatəmah kotəhmen, motapirəkis nəmə nəutəghati kəm lah.

<sup>2</sup> Nian ilah koteruh məmə noliən rəhatəmah in təhruahru vivi, kəni kauteruh nīsiaiən e nəmiəgəhiən rəhatəmah, inu təhmen əmə məmə otiuvi=pa ilah kəhuva o Uhgīn.

<sup>3</sup> Pəh malə-malə rəhatəmah in səniəmə rəha nīpətītəmah, təhmen e noliən rəha nəlisiən nəuanutəmi, uə nuvəniən e natimnati kəmol e aiən u kol tətoraip-oraip,\* uə nuvəniən e napən vi mīn.

<sup>4</sup> Mətəu otol malə-malə e nikitəmah iətəm nəuviriən rəhan ko təsikəiən. Malə-malə u tol lanu, in noliən əpəou əmə, mīne noliən mətig nəməlinuiən əha

---

**2:24** Aes 53:5-6; Rom 6:11    **2:25** Esik 34:5-6; Mat 9:36; Jon 10:14; Hip 13:20-21    **3:1** Efəs 5:22    \* **3:3** Nati kətəuan kəmol e aiən u kol tətoraip-oraip, uə iəring, uə ring, uə nəuanati katəlis nəhlmītəmi lan.    **3:3** 1Tim 2:9

ikin. Noliän əha in noliän keikei kotəuvır e nəhmti Uhgın.

<sup>5</sup> Inu noliän rəha nıpətan nəfaki mın aupən nətəm kəmotələhu=pən əskasik rəhalah nətəligiän e Uhgın. İlah kəmotol nəuia rəhalah mın nəman, kəni noliän əha, kəmautol malə-malə e nıkilah,

<sup>6</sup> təhmen e Serə iətəm təmol nəuia Epraham, kəni mətauın lan məmə in rəhan iətəmi asoli. Kəni itəmäh nenəti Serə nəmə itəmäh nautol noliän mın iətəm kotəhruahru, kəni məsotəginiän.

<sup>7</sup> Kəni itəmäh nəman nətəm nəmotol marit, e noliän əha inəha rəha nısiäiän İərməniğ, nəkotəkeikei motos neinatigiän o neruh vivian rəhatəmäh mın nıpətan e nəmiəgəhiän rəhatəmäh mətəu-inu, ilah kəsotosiän nəsanəniän təhmen e təmah. Kəni mətisai ilah e rəhatəmäh noliän mın mətəu-inu ilah mın okotos mın nati təuvır u, nəmiəgəhiän itulin. Otol lanəha məmə nati kəti otəsisigiän e rəhatəmäh nəfakiän.

### *Nəfaki mın rəfin*

<sup>8</sup> Naunun nəghatiän əha. Itəmäh rəfin nəkotəkeikei motol noliän mın u: otos nətəligiän kətiäh, otasəkəhruin itəmäh mın, otolkeikei itəmäh mın, otol nikitəmäh timətiğ o təmah mın, otosiahu rəhatəmäh nətəligiän.

<sup>9</sup> Nəmə nətəmimi kautol tərəh e təmah, mətəu nəsotalpiniän nitai nərahian. Nəmə nətəmimi kəutəghati rah e təmah, mətəu nəsotalpiniän. Mətəu otəfaki mətəni=pən kəm Uhgın məmə in otol təuvır kəm lah. Nəkotol lanəha mətəu-inu Uhgın təmauin e təmah məmə onəkotol noliän əha, pəh onəkotos nəuviriän rəhan.

10 Nauəuə Rəha Uhgın tətəni məmə,  
 “Iətəmiimi iətəm tolkeikei nəmiəgəhiən təuvir,  
 kəni molkeikei məmə otətəu təuvir nian rəfin,  
 in otəkeikei məsəniən nəghatiən tərəh mın,  
 kəni in otəkeikei məsəniən neiuəiən.

11 In otəkeikei məuhlin in, miet rəkis e noliən tərəh  
 mın,

kəni mol əmə natimnati mın iətəm kotəuvir.  
 In otəkeikei malkut pik məmə otatig ilah nətəmiimi  
 rəfin e nəməlinuian.

12 In otəkeikei mol lanəha mətəu-inu Iərməniğ  
 tateh vivi nətəm kotəhruahru,  
 kəni matətəlig vivi e rəhalah nəfakiən,  
 mətəu tatol tikimir ilah nətəm kautol təfagə tərəh.”

13 ?Nəmə nəkotalkut pik o noliən natimnati mın  
 iətəm kotəuvir, pəh otol nərahiən kəm təmah?

14 Mətəu nəmə nıpəhriəniən nautətəu nahməiən  
 o noliən əhruahru rəhatəmah, kəni nəutatig e  
 nəuviriən pəhriən. Sotəginiən e nərahiən iətəm  
 nətəmiimi kotəhrun noliən kəm təmah, kəni pəh  
 nikitəmah təsəhti pikian.

15 Mətəu e nikitəmah, otisiai Kristo məmə in  
 Iərməniğ. Otəhtul maru e nian rəfin o nuhalpiniən  
 nəghatiən rəha iətəmiimi pəh iətəm tətətapuəh  
 o təmah məmə təhro nəutələhu=pən əskasik  
 rəhatəmah nətəligiən e Iesu. Mətəu otəghati mətig  
 kəm lah e nisaiən.

16 Kəni nian rəfin nəkotəkeikei mətəhrun e  
 nətəligiən rəhatəmah məmə rəhatəmah noliən in  
 təhruahru əmə. Kəni nəmə nətəmiimi kotəghati rah  
 e noliən təuvir mın rəhatəmah mətəu-inu itəmah

rəha Krīsto, ilah okotaulis e nəghatiən tərəh mīn rəhalah.

<sup>17</sup> Nian nautol noliən təuvir mīn, mətəu nautos nahməiən lan, kəni nahməiən u, in nati təuvir nəmə nahməiən u in nətəligiən rəha Uhgīn. Mətəu nəmə nautol noliən tərəh mīn, in nati tərəh, nati əpnəpīn məmə nautos nahməiən lan.

<sup>18</sup> Tol lanəha mətəu-inu, Krīsto təmimis o təfagə tərəh mīn, təmimis nian kətiəh əmə tīnəhmen, ko təsimis mīniən nian kəti. In iətəmi in təhruahru agīn, mətəu təmimis o nətəm kəsotəhruahru iən məmə otos itəmah muvən kəm Uhgīn. Kəmotuhamu in kəni nīpətīn tīmīs, mətəu Uhgīn təmol məmə in təmiəgəh mīn e nīmisiən, e nəmiəgəhiən kəti rəha negəu e neai.

<sup>19</sup> Kəni e nəmiəgəhiən əha, təmuvən məni pətīgəm nəghatiən rəha Uhgīn kəm narmi nətəm kəmoħmīs u kəutatīg e kaləpus,†

<sup>20</sup> ilah u kəmautəhti nəuia Uhgīn aupən aupən agīn nian Uhgīn təmatos rəhan nətəligiən

---

**3:16** 1Pità 2:12 † **3:19** Nətəmimi nətəm kotəhrun vivi Baebol, kəutəni məmə suaru keiu o nəhruniən fes 19 u. Suaru 1: Aupən suah u Noa təmətəni pətīgəm nəghatiən rəha Uhgīn kəm nətəmimi. Nian in təmətəni pətīgəm nəghatiən təhmen lanu, təhmen əmə məmə ilau Iesu kəmətuan. Kəni nəghatiən rəha Noa in təhmen əmə e nəghatiən rəha Iesu. Mətəu nətəmimi e nian əha kəmotəuhlin=pən nəmtahlah e nəghatiən rəhan, kəni rəueiu əha ilah kəutəməhli e kaləpus. Suaru 2: Kəmotətu-pəri Iesu e nigī kəməluau e Fraide. Kəni e Sarere, nian nīpətīn təmətəməhli əhanəh e nīpəg, mətəu narmīn rəhan təmuvən meruh nətəmimi mīn u ilah kəutəməhli e kaləpus u fes 19 tətəni. Kəni məghati kəm lah. In təmuvən məmə təni=pən kəm lah məmə in təmol win e rəhan uək. Mətəu in təməsəgəhaniən e lah məmə okotəuhlin rəhalah nətəligiən kəni motəhatətə lan, mətəu ilah kəmotəmkarəpən rəkis.

əfəməh mətəhtahnin ilah e nian suah u Noa təmatuvləkin negəu. E nian əha rəha nəhu asoli, Uhgın təmosmiəgəh nətəmimi eit əmə nətəm ilah kəməutatig e negəu nian negəu təmuvən=pən e nəhu.

<sup>21</sup> Kəni nəhu əha, in narmi noliən bəptais iətəm tatosmiəgəh itəmah min rəueiu. Noliən bəptais u, nıpətin səniəmə tətəfəl rəkis nəmit e nıpəti iətəmimi, mətəu in təhmen məmə nəkotətapuəh o Uhgın məmə in otəfa kəm təmah nəhruniən məmə rəhatah təfagə tərəh min təmikə. Kəni nəsanəniən asoli iətəm Uhgın təmol Iesu Kristo təmiəgəh min e nımisiən lan, in nəsanəniən iətəm tatosmiəgəh itəmah e noliən bəptais.

<sup>22</sup> Kəni Iesu Kristo tinuvən rəkis əpəha e negəu e neai, kəni mətatig e nıkali Uhgın maru, ikin nısiəniən tətətig ikin, mine nəsanəniən, mine nepətiən. Kəni Uhgın təmol məmə nagelo min, mine natimnati rəfin iətəm kautos nepətiən mine nəsanəniən, ilah rəfin kəutatig ahgəl narməniğiən rəha Iesu.

## 4

### *Suaru rəha noliən nəuia Uhgın*

<sup>1</sup> Tol lanəha natimnati min əha, itəmah onəkotəkeikei motos nətəliğiən rəha Kristo kəni mautəhtul maru o nətəuiən nahməiən e nıpətitəmah, mətəu-inu in təmətəu nahməiən asoli e nıpətin. Nautol lanəha mətəu-inu nəmə itəmah ninotətəu tərəh e nıpətitəmah, nati əpnəpın nautol noliən təuvir min, kəni tətəgətun məmə ninotəpəh noliən rəha təfagə tərəh.



<sup>2</sup> Tol lanəha, nian itəmah nəutatig e nəhue niftəni u, nəsohtohtəu-pəniən suaru rəha noliən natimnati tərah mīn iətəm tətətig e rəhatəmah nətəligiən, mətəu onəkotohtəu=pən suaru rəha noliən nəuia Uhgīn.

<sup>3</sup> Nəmotərəkin rəkis nian tepət o nitəu-pəniən noliən mīn rəha nətəmimi mīn u kəsotəniən nīpəhriənīən e Uhgīn. Aupən, itəmah nəmautit əpnapīn nīpətan; kəni nətəligiən rəhatəmah təmatuvən o natimnati tərah mīn; kəni nəməutəpīs; kəni nəmautol lafet rəha nitəuiən nīpətan; kəni nəməutəmnīm alikol məutəpīs məutəlməli; kəni nəməutəfaki kəm narmī nati mīn iətəm in noliən tərah agīn.

<sup>4</sup> Nətəmimi mīn əha kəsotəniən nīpəhriənīən e Uhgīn, narmīlah təmiuvīg mətəu-inu itəmah nəmotəpəh nitəu-pəniən ilah məhuvən motəmnīm e təfagə tərah rəhalah iətəm təhmen e naruəh asoli iətəm tətəiu. Kəni ilah kəutəni rah pīk itəmah ohni.

<sup>5</sup> Mətəu ilah okotəkeikei motəni pətīgəm natimnati mīn rəfin e nəmiəgəhiən rəhalah kəm Uhgīn iətəm in tətəhtul maru məmə otakil məni nəghatiən rəha nalpīniən rəha nətəm kəmohtmīs, mīne nətəm kəutəmiəgəh.

<sup>6</sup> Tol lanəha, nətəmimi mīn u nətəm kəmohtmīs rəkis, ilah kəmotətəu nanusiən təuvir\* məmə nati əpnapīn kəmohtmīs təhmen e nətəmimi rəfin, mətəu Uhgīn təhrun noliən ilah okotəmiəgəh mīn

---

**4:3** Efəs 2:2-3    **4:5** Uək 10:42    \* **4:6** Nəmə təhro nəghatiən u, “Nətəmimi mīn u nətəm kəmohtmīs rəkis,” tətəghati e nətəmimi nətəm kəmotəhatətə e Kristo, kəni uərisīg lan kohmīs. Uə nəmə təhro tətəghati e nətəmimi nətəm kəmohtmīs e nian rəha Noa (eruh-to 3:19).

e narmín, tǎhmen lan.

<sup>7</sup> Kitah kǎutǎhuva iuǎkir e nian rǎha naunun natimnati rǎfin. Tol lanǎha, otol rǎhatǎmah nǎtǎligiǎn otǎrman-ǎrman mǎmǎ nǎkotǎhrun nǎghatiǎn kǎm Uhgín e nǎfakiǎn iǎtǎm tǎsanǎn.

<sup>8</sup> Kǎni nati keikei in ilis tapirǎkis natimnati rǎfin mǎmǎ, nǎkotalkeikei itǎmah mǎn e nǎkitǎmah rǎfin mǎtǎu-inu e nian nautol lanǎha, kǎni nian rǎfin, nǎutǎhtul maru o naluiǎn e noliǎn tǎrah mǎn rǎhatǎmah.

<sup>9</sup> Kǎni nǎkotǎkeikei motit itǎmah mǎn mǎhuvǎn lahuǎnu mǎn rǎhatǎmah mǎmǎ nǎkotǎuǎn itǎmah mǎn, kǎni motǎgǎtun ikin nǎtǎmimi okotapili ikin. Kǎni mǎsotoliǎn mǎmǎ nǎkitǎmah tǎsagiǎniǎn ohni.

<sup>10</sup> Uhgín tǎmǎfinǎ nǎsanǎniǎn piǎsin piǎsin mǎn kǎm tǎmah kǎtiǎh kǎtiǎh. Tǎuvir mǎmǎ nǎkotal uǎk e nǎsanǎniǎn mǎn ǎha mǎutasiru e tǎmah mǎn. Kǎni otol uǎk ǎha e noliǎn rǎha noluǎk mǎn nǎtǎm kǎutol uǎk ǎhruahru rǎha Uhgín nian rǎfin. Onǎkotǎuǎri nǎuviriǎn rǎhan e suaru piǎsin piǎsin mǎn iǎtǎm in tǎtǎfinǎ.

<sup>11</sup> Tol lanu, nǎmǎ Uhgín tǎmǎfǎn kǎm iǎtǎmi kǎti nǎsanǎniǎn rǎha nǎni pǎtigǎmiǎn, kǎni tǎuvir mǎmǎ in otǎni pǎtigǎm tǎhmen ǎmǎ mǎmǎ rǎhan nǎghatiǎn in rǎha Uhgín. Nǎmǎ Uhgín tǎmǎfǎn kǎm iǎtǎmi kǎti nǎsanǎniǎn rǎha nasiruiǎn, kǎni tǎuvir mǎmǎ in otasiru e nǎtǎmimi e nǎsanǎniǎn iǎtǎm Uhgín tǎmǎfǎn mǎmǎ, e natimnati rǎfin, nǎtǎmimi okotǎni-vivi Uhgín o nati iǎtǎm Iesu Kristo tǎmol. Pǎh kitah kǎutǎni pǎtigǎm rǎhan nǎuviriǎn mine nǎsanǎniǎn ǎmǎ lanko matuvǎn naunun tikǎ. ǎuǎh.

*Nǎfaki mǎn okotos nahmǎiǎn e nǎpǎtilah*

<sup>12</sup> Iəu mɪn nəuvein nətəm iəkolkəikei pik itəmah, iəkəhrun məmə rəueiu nərahian əskasik tatələs pikin itəmah təhmen e nigəm, kəni nautətəu nahməiən asoli lan. Mətəu təsəuviriən məmə narmitəmah otiuvig pik o nərahian mɪn əha. Nərahian mɪn əha kəutəhuva o nətəmimi tepət, səniəmə itəmah əmə.

<sup>13</sup> Mətəu təuvir məmə nikitəmah otətagiən əmə mətəu-inu nautətəu nahməiən təhmen=pən əmə e Kristo. Kəni nəmə nautol lanəha, kəni nikitəmah otagiən pik agin nian in otol əpu rəhan nəhagəhagiən asoli rəha nəuviriən mine nəsanəniən rəhan.

<sup>14</sup> Nəmə nətəmimi kəutəni rah itəmah o nərgi Kristo, kəni onəkotatig e nəuviriən pəhriən, mətəu-inu nian kəutəni rah itəmah o Kristo, inu tətəgətun məmə Narmɪn Rəha Uhgɪn iətəm təsanən məhagəhag mətətig o təmah.

<sup>15</sup> Tərah məmə itəmah kəti otol nolian rəha nohamuiən itəmi, uə nakləhiən, uə natgəhliən lou, uə təfagə tərah əkəku kəti təhmen e nəghati pikian. Nəmə in tatos nalpɪniən mətətəu nahməiən ohni, kəni təhruahru əmə.

<sup>16</sup> Mətəu nəmə itəmah nautos nahməiən mətəu-inu itəmah Kristin mɪn, sotaulisian ohni, mətəu nəkotəkeikei motəni-vivi Uhgɪn məmə nautos nərgin u Kristin.

<sup>17</sup> Tol lanəha mətəu-inu nian rəha nakilian nətəmimi rəha Uhgɪn tinətuəuin. ! Kəni nəmə nakilian əha tinətuəuin e nətəmimi rəha Uhgɪn, kəni okəmanəhro e nətəmimi mɪn u kəutəhti nanusiən təuvir rəha Uhgɪn!

<sup>18</sup> Nauəuə Rəha Uhgɪn tətəni məmə,

“Nəmə in tiəkis o nətəm kotəhruahru məmə Uhgın otosmiəgəh ilah,

kəni otiəkis pik o nətəmimi kotəruru Uhgın mautol təfagə tərəh məmə in otosmiəgəh ilah.”

<sup>19</sup> Kəni tol lanəha, nətəmimi nətəm kautətəu nahməiən mətəu-inu in nətəligiən rəha Uhgın, təuvir məmə ilah okotələhu=pən nəmiəgəhiən rəhalah e nəhlmi Uhgın iətəm təmol neai mīn niftəni mine natimnati rəfin, kəni nian rəfin in tatol rəhan nəghatiən. Kəni təuvir məmə ilah okautəkeikei mautohtəu=pən mīn əmə suaru rəha nolīən təuvir.

## 5

### *Nəghatiən tətuvən kəm eldə mīn mine nətəm alua*

<sup>1</sup> Kəni rəueiu, iəkolkeikei məmə iəkəghati nəuветin kəm təmah eldə mīn rəha niməfaki. İəu eldə kəti iəkəhmen e təmah, kəni iəu əhruahru iəmeruh nahməiən rəha Kristo, kəni Uhgın otəfa kəm tah rəhan nəuветin nəhagəhagiən asoli rəha nepətiən mine nəsanəniən rəhan, iətəm in otol əpu.

<sup>2</sup> Inu rəhak nəghatiən kəm təmah məmə, otol uək rəha neh viviən nətəmimi rəha Uhgın nətəm kəutatig e nəhlmitəmah, təhmen e iətəmi rəha sipsip iətəm tateh vivi rəhan sipsip mīn. Kəni otol e nīkin agiən mətəu-inu nəkotolkeikei məmə nəkotol. Inu nətəligiən iətəm Uhgın tolkeikei. Mətəu təsəuviriən məmə nəkotol nikitəmah təsagiəniən məmə nəkotol. Kəni sotoliən mətəu-inu nikitəmah təhti məmə onəkotos pik məni lan.

Mətəu otol əmə mətəu-inu nikitəmah tətəgiən məmə onəkotasiru.

<sup>3</sup> Kəni təsəuviriən məmə itəmah nəkəhuva motəhmen e iətəmi asoli iətəm tatol təskasik kəm rəhan noluək mən, mətəu itəmah onəkotol noliən iətəm in təhruahru məuvir məmə iəfaki mən kotəhrun neruhiən kəni motohtəu=pən noliən rəhatəmah.

<sup>4</sup> Iətəmi asoli rəha nətəmi kəutəsəl vivi o sipsip mən otiet pətigəm=pa mən, kəni e nian əha, in otəfinə nətəouiən təuvir rəha nisiaiən kəm təmah iətəm ko rəhan nəuviriən təsikəiən.

<sup>5</sup> Kəni e noliən kətiəh əmə, itəmah nətəm aluə, otisiai motol nəuia eldə mən rəha niməfaki. Kəni itəmah rəfin ağin onəkotosiahu rəhatəmah nətəligiən teiuaiu mautesiai itəmah mən rəfin. Otol lanəha mətəu-inu Nauəuə Rəha Uhgın tətəni məmə, “Uhgın təsəgiənən e nətəm kəutəfəri mətəhtipəsig e lah,

mətəu tətəfən rəhan nəuviriən kəm nətəm kautosi-ahū aru ilah.”

<sup>6</sup> Kəni tol lanəha, otosiahu aru itəmah motatig ahgəl nəhlmi Uhgın əsanən, məmə in otəfəri itəmah e nian əhruahru rəhan.

<sup>7</sup> Kəni otos rəfin natimnati mən nəutətəlig lan məhuva motələhu=pən kəm Uhgın mətəu-inu, in tolkeikei itəmah məteh vivi itəmah.

<sup>8</sup> Otair mauteh vivi mətəu-inu rəhatəmah tikimir Setən in təhmen=pən e laion kəti iətəm tətəiu oneuən kəni nikin tətərkərik mətəsəl e iətəmi məmə otun.

---

**5:2** Jon 21:15-17; Uək 20:28      **5:3** 2Kor 1:24; Fil 3:17; Tait 2:7

**5:5** Prov 3:34; Efəs 5:21; Jem 4:6      **5:6** Mat 23:12; Luk 14:11; Jem 4:10      **5:7** Mat 6:25-30      **5:8** 1Təs 5:6

<sup>9</sup> Otəhtul əskasik e nəhatətəiən rəhatəmah nian Setən tətuvə o təmah, mətəu-inu itəmah nəfaki min nəuvein əpəha ikin min rəfin e nəhue niftəni, kautos əmə nəhməiən əhmen əmə.

<sup>10</sup> Mətəu uərisig lan nəmotətəu rəkis nəhməiən e nian əkuəkir əmə, kəni Uhgın otol nəkotətəu təuvir min e rəhatəmah nəmiəgəhiən, kəni mol nəkotəsanən e rəhatəmah nəhatətəiən, motəhtul əskasik, kəni nati kəti otəsiuvi rəkisiən itəmah. Nəuviriən min rəfin tatsipən əmə o Uhgın, kəni in təmauin e təmah nəkəhuva e Kristo məmə nəkəhuvən e nəhagəhagiən asoli rəha nəuviriən rəhan, mine rəhan nəsanəniən iətəm tətətig itulin.

<sup>11</sup> Pəh kotəni pətigəm nəsanəniən rəha narmənigiən rəhan, tətuvən əmə lanko naunun tikə. Əuəh.

### *Naunun nəghatiən*

<sup>12</sup> Sailəs\* itimlau min, təmasiru e nauəuə u, kəni iatəh məmə in piak təuvir kəti, kəni rəhak niphəriənən tətətig lan. İətətəi nauəuə əkuəkir u kəm təmah məmə iəkəfəri rəhatəmah nətəligiən, kəni iatəni pətigəm məmə natimnati iətəm iəmətəi rəkis, kəutəghati e nəuviriən pəhriən rəha Uhgın. Otəhtul əskasik lan.

<sup>13</sup> Piatəmah min mine nəuviniətəmah min e

---

**5:9** Efəs 6:10-18; Jem 4:7    **5:9** Efəs 6:11-13; Jem 4:7    \* **5:12** Nəghatiən Kris tətəni nərgin u məmə, “Silfanus” iətəm in nərgin əkuəkir u “Sailəs.”    **5:12** Uək 12:2,25; 13:13; 15:22,30

niməfaki u ikinu Rom kəutəni təuvir kəm təmah.†  
Uhgın təmitəpın itəmah min ilah. Kəni nətik u Mak,  
in min tətəni təuvir kəm təmah.

<sup>14</sup> Otəni təuvir kəm təmah min təhmen məmə  
itəmah kətiah əmə e Kristo.

Pəh Uhgın otəfinə rəhan nəməlinuian kəm təmah  
rəfin u nətəmimi rəha Kristo.

---

† **5:13** Nəghatiən Kris əhruahru tətəni məmə, “Pətan iətəm tətətig Papilon,” mətəu nıpətin məmə “niməfaki əpəha Rom.” E nian rəha Oltestimin, Papilon in taun asoli kəti iətəm nepətiən mine nəsanəniən rəfin rəha nəhue niftəni tətətig lan, kəni nətəmimi ikın kəutol tikimır kəm nətəmimi min rəha Uhgın. Kəni təhmen=pən əmə e nian rəha Pitə, Rom tətarməniğ e lahuənu min rəfin mətəməki e nətəm kəutəfaki kəm Uhgın. **5:13** Uək 12:2; 2Tim 4:11

**Nauəuə Asim Rəha Uhg̃in Nəmtət̃iən Vi**  
**The New Testament in the Whitesands language of**  
**Tanna Island, Vanuatu**  
**Niutesteman long Nərak, lanwis blong Whitesands**  
**Tanna, Vanuatu**

Copyright © 2014 Wycliffe Bible Translators, Inc.

© Wycliffe Bible Translators, Inc.

Language: Whitesands

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

913a182a-255f-5344-b6b0-0294ba221e87